

ԵՐՈՒՅԱՆԻ ՆՈՎԵԼՆԵՐԻ ԳԵՂԱՐՎԵՍՏԱԿԱՆ ԱՌԱՆՁՆԱՀԱՏԿՈՒԹՅՈՒՆՆԵՐԸ

Ս. Վ. ՀՈՎՀԱՆՆԻՍՅԱՆ

Իրականության գեղարվեստական արտացոլումը Երուխանի նովելներում հատկանշվում է այդ ժանրի համար շատ էական առանձնահատկություններով՝ իրապաշտությամբ, կյանքի գեղարվեստական ընկալում և վերաբերություն. հակիրճ ձև: Առհասարակ Երուխանի նկարագրին խորթ մնաց նովելի ժանրում նորարար լինելու ձգտումը, սակայն իր տաղանդն ու գրական դավանանքը աննկատելիորեն նրան դարձրին իսկապես նորարար: Նա ընդլայնեց արևմտահայ գրականության թեմատիկան՝ պատկերելով հասարակ, մոռացված ու անանուն մարդկանց մի ամբողջ աշխարհ:

Ընդհանրապես արևմտահայ գրականության մեջ իրապաշտական շարժումը աչքի էր ընկնում հասարակ ժողովրդի կյանքին մոտենալու, նրա մեջ թափանցելու ազնիվ ձգտումով: Իրական ստեղծագործության համար շատ կարևոր սյուժեներ տվող կյանքի համակողմանի ընդգրկման տեսակետից Երուխանը կարողացավ խորը թափանցել հասարակ աշխատավոր մարդկանց կյանքի մեջ:

Երուխանի նովելների հերոսները մեծ մասամբ ծովի մառդիկ են: Նրանք աչք են բացել ծովափին, անհոգ օրերին զմայլվել նրանով: Ծովը նրա նովելներում առանձնակի տեղ է գրավում: Հիասքանչ բնության ու ծովի գաղտնիքների մեջ է թափանցել Երուխանի միտքը և սովորել զգալ ու մտածել այդ խորհուրդներով: Ծովի խորհրդավոր տարերքի մեջ նա որոնում է գեղեցկություն, երազում է տեսնել բնության և մարդու գեղեցկությունների ներդաշնակություն:

Ինչպես Նար-Դոսը, այնպես էլ Երուխանը պատկերում են նույն ժամանակահատվածի մեծ քաղաքների ծայրամասային թաղամասերում սովի ու աղքատության տակ կքված հասարակ մարդկանց անմխիթար վիճակը: Սակայն նկատելին այն է, որ Նար-Դոսի նովելների հերոսների նկարագրում իրեն որոշակիորեն զգացնել տվողը հարադատների նկատմամբ ունեցած անտարբերությունն է: Ամուսինը սպանում է կնոջը և հայտարարում՝ «Ի՞նչ եմ արել որ, մի մուշտի եմ տվել» («Թե ինչ եղավ հետո...»), ընտանիքի հայրը մարմնացած գաղանթություն է սեփական հարկի տակ («Հոգուն վրա հասավ»), որդին գողանում է մոր ապրուստի միակ միջոցը՝ հավը («Սև փողերի տուկոսը»):

Բուրժուական հարաբերությունների բուռն դարգացումը քաղաքում, իրոք անողորմ կերպով կտրել է հարադատների սուրբ ու ազգակցական կապերը: Մարդիկ դիմազրկվել են, հույզը չորացել, գերիշխում է բնազդը, որը շատ հաճախ գազանային երանգներ է ընդունում:

Երուխանի նովելներում ընտանիքը գրեթե միշտ հանդես է գալիս առանձին, այն ինքնամիտ միավոր է: Սակայն այդ փոքրիկ միավորի մեջ ընտանեկան հարաբերությունների համար բնորոշը հովվերգական բարությունն է:

Երուխանի հերոսներն ընտելացել են ստեղծված դրությունը: Նրանք չեն վախենում թշվառությունից, ընդհակառակը, արհամարհում են այն, հոգով բարձր են ու եթե սիրում են, ապա այդ սերը մարդկայնորեն ուժեղ է և անկեղծ, եթե ուրախանում են, մի քան, որ հաղվագյուտ է պատահում, ապա կարողանում են ուրախանալ հոգու ամբողջ թափով:

Մրբավան երկյուղածությամբ Երուխանը փայփայում է այն ճշմարիտ հավատամբը, թե բոլոր հոգևոր գեղեցկությունների միակ և անսպառ աղբյուրը «խոնարհ դասակարգն» է:

Երուխանի նովելները լույս էին տեսնում ժամանակի պարբերականներում: Ուշագրավն այն է, որ յուրաքանչյուր վերնագրի տակ հեղինակը գրել է նաև ենթավերնագիր-ծանոթագրություն՝ ժողովրդական բառի, ժողովրդային պատմություն, իրական կյանքի պատկեր մր, պարզ պատմություն, կյանքի պատկեր մր, իրական կյանքի պատկերներ, գաղթականի հուշատետրես, ժամանակակից բառեր:

Նրա նովելային աշխարհը բնակեցված է գերազանցապես դժբախտ հերոսներով: Այլ կերպ լինել չէր կարող, քանզի նա սյուժեները վերցրել է կենդանի իրականությունից՝ սուլթանական արյունոտ ռեժիմի, ահալոր հետամնացության շրջանից և իր տեսածը, ապրածն ու զգացածը գեղարվեստորեն արտահայտելու համար չի որոնել վերերկրային, անիրական կերպարներ:

Երուխանի նովելների առանձնահատկություններից մեկն այն է, որ հեղինակի նկարագրածը իրական է, իսկ ինքը՝ նովելում ծավալվող իրադարձությունների ակտիվ մասնակից: Մարդկային կյանքի բարդ ոլորտը թափանցելը, նրա ծալքերում խնամքով թաքնված իրողությունները հետազոտելը և դրանց գեղարվեստական մարմնավորումը կազմում են Երուխան-նովելիստի նկարագրի շեշտված գծերը:

Նովելիստի համար բնութագրականն այն է, որ նա հանդես չի գալիս որպես սոսկ հետևող, սառն ու անտարբեր դիտող, այլ ձգտում է ձուլվել հերոսի անհատականությանը: Նա հետզհետե խորամուխ է լինում իր հերոսի հոգևոր դրամայի մեջ. «Հանկարծ սթափեցա հառաչանքե մը, սրտի անդունդներեն դուրս պոռթկացած ու իր հետ բերելով ավերակ, ջարդուփշուր սրտի մը սփռփանքը»:

Մեկ այլ նովելում («Վրեժը») գիշերային պահ է, ծովի վրա սուրում է նավը, տախտակամածին կանգնած՝ ծանր տվյալտանքների մեջ է նովելի հերոսը: Երուխանը հետևում է նրան, ձգտում է վերծանել այն, ինչը մնում է անարտահայտելի, խորհրդավոր ու անմեկին: Սա հեղինակի ստեղծագործական երկունքի մի պահն է, որտեղ լարումը հասցնում է շիկացման. «...Այդ սրտաճմլիկ տխրության առջև անդիմադրելի պետք մը կղզայի իրեն դիտելու և լսելու. «Բարեկամ, ի՞նչ է վիշտդ, արդյոք, կրնա՞մ սփռփել քեզ, ըսե՛, խոսե՛, թեթևացի՛ր, գուցե ճար մը կա»:

Անհատի հոգեկան գալարումներն ու տաղնապը առմիջապես կամուրջ են դրում հեղինակի և իր հերոսի միջև: Երուխանը անձեռակերտ կամուրջով զգուշորեն և հետազոտողի խորաթափանց հայացքով քայլում է դեպի երկի հերոսը, սուղվում նրա ներաշխարհը: Մի քանի ցայտուն վրձնահարվածներ, և ընթերցողին ներկայանում է մի ընդգծված բնավորություն՝ իր ուրույն հոգեբանությամբ: Եվ որովհետև նովելիստին հաջողվում է վերապրել նաև իր հերոսի

ներքին հուզն ու խոհը, վշտերն ու մորմոքը, կերտած պատկերը ասասների է, կերպարը՝ տիպական։

Երուխանի հերոսները կյանքի նկատմամբ շատ շափավոր պահանջներ են ներկայացնում։ Շատ քչով բավարարվող այդ մարդիկ երբեմն իրենց կյանքը համարում են նաև «անամպ, խաղաղ ու շենշող» («Սերինա»), մաքառում են, տանջաճար լինում, սակայն չեն դժգոհում, տրտնջում են դեպքից դեպք։ Նրանց ամենադժան պայքարը մի պատառ հացի համար հաճախ իրենց իսկ կողմից դիտվում է որպես կյանքի վարճացման բնականոն ընթացք։

Սակայն, որպես կանոն, այդ հերոսները հատկապես դժգոհում են, երբ ձախողվում են կամ մերժվում սիրո մեջ։ Այս ֆոնի վրա գլուխ է բարձրացնում կոնֆլիկտը։ Ինտիմ անհաջողությունը բացում է հերոսի լեզուն, աշխարհի անարդարությունների դեմ նրա հոգում կուտակված մաղձը նոր միայն դուրս է ժայթքում։

Երուխանի նովելների հիմքում ընկած կոնֆլիկտը, որը առավելապես ստանում է ողբերգական լուծում, բխում է մարդու վառ երազանքների և նրան մանրացնող բիրտ իրականության միջև եղած հակամարտություններից։ Հեղինակի նախընտրած հերոսները՝ հասարակ աշխատավոր մարդիկ, իրենց վիրավորված հոգում, կոշտ արտաքինի տակ ունեն բնարական քնքրություն, անկեղծություն, արդարախոհ են և հանդես են գալիս որպես իրենց ծնած դասակարգի ուժի և գեղեցկության կրողներ։

Տալով հասարակության ուժերի փոխադրեցությունը հերոսների արարքների պատկերմամբ, Երուխանը հոգ է տանում՝ չխախտել իրական կյանքի և նրա գեղարվեստական ընկալման ու մաքսիմալիզման միջև եղած ճշմարիտ հարաբերությունը։ Գեղագիտական այս շափանիշի կիրառումը առարկայացված ձևով ուրվագծում է պատկերվող միջավայրի բուն ոգին։

Երուխանի մի շարք նովելներ, դուրկ լինելով սոցիալ-հասարակական բարձր հնչեղությունից, գեղարվեստական վավերագրի ուժ ունեն և անխարդախ հայելու մեջ անդրադարձնում են բոլոր դեպքերում մաքր մնացող հերոսների աշխարհը։ Նրա հերոսները մարդկանց և աշխարհին նայում են անկեղծությամբ և անմիջականորեն։

Երուխանը պարզորոշ տեսնում է, որ իր ժամանակի հասարակության մեջ մարդկային նկարագրի լավագույն գծերը արժեքազրկված են, որ մարդու սըրբազան և անբիծ զգացումները գոհակացվում են ու տրորվում ցեխի մեջ։ Եվ ժամանակաշրջանի հատկապես հակահումանիստական այս խորշակն է, որ ոչնչացնում է Երուխանի դրական հերոսին։ Երուխանի հերոսների համադրավական է կյանքի մի փոքրիկ ցնցումը, և նրանք խորտակված են։ Սակայն նրա դրական հերոսների համար հատկանշականն այն է, որ նրանց խորտակումը ավելի շուտ գեղեցիկ նահատակություն է, քանզի հերոսը տեսնում է իր անկումը՝ «Ես մարդկայնորեն մարդ մնացի» սփոփոխ գիտակցությամբ։

Մարդկային սիրտը բացելու և նրանում տեղի ունեցող անցուդարձերը բացահայտելու գրական հակումը նովելիստ Երուխանի ստեղծագործության ամենարևոտ գիծն է։ Երուխանի հերոսները մեծ մասամբ չեն ենթարկվում դարի եղծանող ու մաշիչ ազդեցությանը և մինչև վերջ սրբազան երկյուղածությունով ու խնամքով պահպանում են մարդկային ազնիվ զգացմունքները և բնավորության լավագույն գծերը։

Երուխանի գեղադիտական իդեալը մարդուն մարդ պահելն է, և նա գերազանցապես հրապուրվում է այդպիսի հերոսներով, սակայն իր մի շարք նովելներում նա կերտել է տիպեր, որոնք զերծ չեն նկարագրի հիվանդագին ախտահարումից: Դրանք այն մադդիկ են, որոնք ընկել են դրամի համար մղվող պայքարի հորձանուտը («Վարձու տուն», «Հուռութքը», «Քավություն»):

Ինչպես Նար-Դոսի, այնպես էլ Երուխանի հերոսները ապրում և գործում են մեծ քաղաքների արվարձաններում: Որպես անմիջական արդյունք բուրժուական հարաբերությունների բուռն զարգացման, առաջ է եկել կապիտալիստական խոշոր արտադրությունը, և Նար-Դոսի մանր արհեստավորները զրկվել են իրենց արհեստով նախկին ձևով ապրելու հնարավորությունից: Երուխանի հերոսների մեծ մասը ապրում է դեռևս նախնիներից ժառանգած ավանդական արհեստով, չնայած ակնհայտ կերպով երևում է, որ առևտրի ասպարեզում նոր ու անսովոր երևույթներ են երևան եկել նաև Երուխանի հերոսների միջավայրում: Այստեղ էլ բուրժուական հարաբերությունները հոշոտում են և կլանում համեմատաբար փոքր առևտրականներին: Հասարակության անդամի միամտությունից և այդ նույն հասարակության միջև ծագած բախումից Երուխանի հերոսների անձնական դրաման հուզիչ երանդներ է ստանում:

Երուխանի նովելներում առավել ցնցող դրամա է ապրում կինը: Խուսափելով միակողմանիությունից, նա կերտել է կնոջ լիարժեք կերպարը՝ իր բազմազան դրսևորումների մեջ: Երուխանի նկարագրած կինը նվիրական իդեալների կրող է: Նա ուժգին սիրել գիտե, հավատարիմ կին է, մոլեռանդորեն սիրող մայր, գեղեցիկի կրող է, արժանապատվության բարձր գիտակցության նախանձախնդիր: Սերված լինելով ժողովրդական «խոնարհ» խավերից և ապրելով սիրելու և փաղաքշելու համար բոլորովին աննպաստ պարագաներում, Երուխանի պատկերած կինը հատկանշական է իր կանացի հրապույրներով: Նա շափազանց զգալուն է, գիտե հափշտակվել իր նախրնտրած տղամարդով, ձուլվել նրա էությունը, իսկ սիրած տղամարդուն կորցնելու դեպքում Երուխանի կինը փայայտի ու անիրական պատրանքներով: Երուխանի դրական կին հերոսը հավերժական սիրահար է, կանացի դուարյուն գծեր ունի: Կողմնակի ոչ մի հովեր չեն գիպել նրա կին հերոսներին: Անխառն այդ հերոսուհիները չեն պճնվում, չեն սեթեթում ու հենց դրանում է տղամարդկանց հաճելի լինելու նրանց արվեստի հմայքն ու գրավչությունը: Գեղարվեստորեն ցուցադրելով իր հերոսուհիներից մեկի վարքը, Երուխանը գրում է. «Անոր սիրտն ամենազգալուն կշիռ մըն էր, որուն վրա հյուլի մը ծանրությունն իսկ կըրնար աղղեցություն մը բանեցնել» («Տապանագիրը»): Երուխանի հերոսուհին զգում է, որ անգոր է և մնում է լուռ ու հպարտ, անէանում է, սակայն հպարտորեն է կրում իրեն բաժին հասած ճակատագրական թախիժը:

Ընտանեկան երջանկության կանացի իդեալը, սակայն, դիպչում է հիվանդոտ դարի սառն ու անտարբեր պատերին ու ջարդուփշուր է լինում: Այդ նուրբ կակը սեր է երազում, բայց կոպիտ իրականությունը փուշ ու արցունք է հրամցնում նրան:

Երուխանն իր առջև խնդիր չի դրել գեղարվեստորեն մարմնավորել պատկերվող ժամանակի սոցիալ-քաղաքական մեծ պրոբլեմները: Նրա հերոսները հիմնականում գործում են արյունոտ իրականության կնճռոտ հարցերից դուրս, և հեղինակը թափանցում է նրանց մասնավոր կյանքի մեջ, նրանց ներաշխարհը՝ զբաղվելով մարդու անձնական դրամայի բացահայտմամբ, իրական-

նության գեղարվեստական պատկերման այդ ուղիով հեղինակը հանրագումարի է բերում իր հերոսների ներաշխարհում խլրտացող հույզերը՝ ակնբախորեն ցույց տալով, որ իր կերտած կերպարների անձնական դրաման բխում է տվյալ դարաշրջանի սոցիալ-քաղաքական ընդհանուր վիճակից: Այս գաղափարի բացահայտ դրսևորումը նովելներում չկա, բայց թաքնված միտումը տրոփում է յուրաքանչյուր տողի մեջ:

Երուխանի ստեղծագործության ինտելեկտուալիզմը աչքի է ընկնում ուրույն գծերով: Նախ՝ նրա հերոսները տկար ու անուժ են հասարակական կյանքի, ինչպես նաև կենցաղի առեղծվածների դեմ հանդիման: Երուխանի հերոսները, որպես կանոն, իրենց արարքներում առաջնորդվում են ժողովրդական իմաստությամբ: Սիրո և հավատարմության, աշխատանքի ու արդար վաստակի, ընկերասիրության և հասարակության մեջ գրաված տեղի, կենցաղի, վարքի ու բարքերի մաքրության շատ հարցերի գեղարվեստական մեկնաբանմամբ Երուխանի հերոսների ըմբռնումները ստանում են համամարդկային երանգներ:

Երուխանը հոգեբան արվեստագետ է: Գրողի նրա խառնվածքի համար բնորոշ է աճող հետաքրքրությունը մարդու ներաշխարհի և հոգեբանության նկատմամբ: Ցուցադրելով ֆիզիկական, արատ ունեցող իր հերոսներից մեկի՝ Կումիկի («Կուղը»), մարմնական և հոգեկան վերքերը, նովելիստը անհատի մանրանալն ու անկումը բացատրում է նաև հոգեբանական դրդապատճառներով: Ապացույց՝ նովելի հակիրձ, բայց շատ խոսուն ավարտը. «Բժիշկ մը վալցուցին: Սա՝ հետ քննության՝ հաստատեց, թե Կումիկ մեռած էր իր վերքերեն: Ու բժիշկը կսխալեր: Կումիկ սիրտին ցավեն մեռած էր» (ընդգծումը մերն է — Ս. Հ.): Այս եզրակացությունը ոչ թե սոսկ հայաաֆարություն է, այլ նովելում ծավալված իրադարձությունների տրամաբանական հետևանքը: Հեղինակային այդ եզրակացությունը միևնույն ժամանակ բանալի է՝ սյուժեի և նրանում եղած գաղափարի ընկալման համար: «Սիրտին ցավեն մեռած էր» եզրահանգումը նովելի նախադրությունից մինչև լուծումն ընկած գործողությունների դրամատիկ զարգացման հաստատումն է, անհատի անիմաստ կյանքի կործանման պատճառաբանությունը:

Շեշտը դնելով հատկապես հերոսների արարքների հոգեբանական դրդապատճառների բացահայտման վրա, Երուխանը ընթերցողի միտքը տանում է նկարագրվող կերպարների ներաշխարհը: Երբեմն Երուխանի հերոսները ընդհուպ մոտենում են փայփայած իդեալին, երազանքների ու ձգտումների վերջնագծին, բայց հենց այստեղ էլ տեղի է ունենում առաջին հայացքից տարօրինակ և անսպասելի թվացող ավարտը՝ մեծահոգաբար մերժում («Ձուկին փոխարեն», «Երկու երդումները») կամ կսրուկ հրաժարում բաղձալից («Ձրկնորսին սերը», «Քարիտեղձին»):

Նման առանձնահատկության շնորհիվ Երուխանի նովելները ակտիվացնում են ընթերցողին՝ ստիպելով ետադարձ հայացք նետել և վերաիմաստավորել կարդացածը, խորհել, քննել: Ընթերցողի մտավոր ներթափանցումը նովելային իրադարձությունների խորքը նրան բերում է այն համոզման, որ, այո, նովելի այդօրինակ ավարտը բնականոն է և տրամաբանական՝ շնորհիվ հեղինակի հոգեբանական նուրբ և բարձրարվեստ վերլուծությունների:

Երուխանի նովելներում ողբերգականի գեղարվեստական մարմնավորումը առաջացնում է կարեկցանքի զգացում, իսկ հոգեբանական դրդապատճառներով

հիմնավորված կարեկցանքը բխում է սոցիալական միջավայրից: Նրա նովելներում շոշափված գաղափարների ամբողջությունը ոչ այլ բան է, քան կոպիտ, հակահումանիստական իրականության մերկացումն ու ժխտումը:

Երուխանն ունի սոցիալական որոշակի ըմբռնումներ և համոզմունքներ: Պասակարգային հասարակության մեջ նա պարզ տեսնում է հասարակ մարդկանց անլուր շահագործումը, նրանց իդեալների խորտակումը, սակայն քրննադատական ռեալիզմի նույնիսկ դեմոկրատ ներկայացուցիչներին հատուկ աշխարհայացքային որոշակի սահմանափակության պատճառով չի գիտակցում շահագործումից ազատագրվելու իրական ուղիները: Երուխանի ինչպես գրական, այնպես էլ հրապարակախոսական երկերում անհնար է գտնել այն հարցի կոնկրետ պատասխանը, թե ինչպե՞ս է գալու ցանկալի արշալույսը:

Ինչպես ձևի, այնպես էլ բովանդակության տեսակետից Երուխանի նովելները բարձրարվեստ նմուշներ են: Վարպետ գրողը, օգտագործելով գեղարվեստի ընձեռած ճոխ ու բաղմաղան միջոցները, հյուսում է գեղեցիկ պատկերներ, սեղմ տողերում կարողանում է ասեղնագործել հերոսների ջերմ ու սրտառու ապրումներ, հույզեր, հոգեբանական նուրբ երևույթներ:

Պահպանելով նովելի ավանդական պատմողական ձևը, Երուխանը այդ ժանրին մոտենում էր կյանքից և ոչ թե նախօրոք մշակված սխեմաներից ու գաղափարներից: Երուխանի մոտ մարդկային հարաբերությունների, ինչպես նաև իրերի ու երևույթների մեջ տեղի ունեցող անցումները ներքնապես տրամաբանված պատճառաբանություն են ստանում: Նրա նովելներում գեղարվեստական մարմնավորում են ձեռք բերում կյանքի ինչպես սովորական, հաճախ կրկնվող, տիպական, այնպես էլ արտասովոր, պատահական երևույթներն ու փաստերը, որոնք, իհարկե, բխում են նկարագրվող իրողության բնորոշ, տիպական աղբյուրներից:

Իրականության մեջ շատ հաճախ սովորականի սկիզբն անսովորն է, որը նախքան տիպական դառնալը, զուրկ է հասարակական սուր հնչեղությունից: Այդուհանդերձ, հաճախ կրկնվողի վերածվելու ակնհայտ նախանշաններ ունեցող պատահականի գեղարվեստական մարմնավորումը հնարավորություն է ընձեռում ավելի խոր ճանաչելու սովորական-տիպականը:

XIX դարի վերջին և XX դարի առաջին տասնամյակներում համաշխարհային նովելիստիկայի պատմության մեջ որոշակիորեն նկատվում է մի շատ կարևոր երևույթ՝ նովելի ծավալի զգալի սեղմում: Նույն երևույթը նկատվում է նաև արևմտահայ նովելիստների ստեղծագործության մեջ. Զոհրապի, Երուխանի լավագույն նովելների ծավալը կաղմում է շորսից վեց էջ: Իրականությունը գեղարվեստական խտացված ձևի մեջ ներկայացնելու ասպարեզում Երուխանը հանդես է բերում անվիճելի տաղանդ ու մեծ վարպետություն:

Երուխանի՝ կյանքի կարոտով տոշորվող և սակավախոս հերոսները մարդկային խոսքով անարտահայտելի զգացմունքները արտահայտում են դիմախաղման օրինաչափով, ժպիտով ու արցունքով, մանավանդ նովելի էջերից աննկատելիորեն կերպավորվող մարդու տխուր աչքերով ու զգացմունքային ձայնարկություններով:

Ինքնաբացահայտման պահին հատկապես բաղմանշանակ արցունքը ընդգծված ձևով հաճախ է հանդիպում և հերոսի անձնական դրամայի ու խոսքով անարտահայտելի զգացմունքների խոսուն արտահայտիչն է:

Երուխանի նովելներում սյուժետային գծի դրսևորման գլխավոր ձևը հեղինակային պատումն է: Իրադարձությունների ծավալումն ու ընթացքը, գործողության զարգացումը, հերոսների արարքները, բնավորությունն ու հոգեբանությունը թրծվում, առարկայացված տեսք են ստանում հեղինակի պատմելաձևում: Այս ճանապարհով ստեղծված պատկեր-գործողությունը երբեմն միայն ուղեկցվում է գրական կերպարների միջև տեղի ունեցող երկխոսություններով: Այստեղ իրենց զգացնել են տալիս ներքին բարձր լարում ունեցող խոսքը և երկխոսությունների ու մենախոսությունների ուժը: Հերոսների հակիրճ տրամախոսությունը ընթերցողի հայացքի առջև բացում է մի ամբողջ աշխարհ, աչքի է ընկնում բովանդակության հարստությամբ: Երկխոսությունների և մենախոսությունների մի հպանցիկ դրվագ՝ և Երուխանի հերոսները ներկայանում են որպես որոշակի բնավորություններ, տարբեր խոհերով ու հետաքրքրություններով ապրող ընդգծված անհատականություններ: Բնորոշն այն է նաև, որ Երուխանի հերոսը վրուցում է սեփական հսկի հետ: Այս ճանապարհով հեղինակը հասնում է հերոսի ինքնաբացահայտման: Գրական կերպավորման այս եղանակը Երուխանի նովելների ցայտուն առանձնահատկություններից մեկն է:

Երուխանի նովելներում հերոսների խոսքաարտահայտչական պասսիվությունը լրացվում է նրանց ակտիվ դիմախաղով: Այստեղ գրական հերոսի լուռ նայվածքը, աչքերի արտահայտությունը, խոհ-հուզական որևէ ժեստը կամ հառաչանքը լեզվից ավելի պերճախոս են: Նրանք «խոսում են»՝ դրսևորելով հերոսի և իրականության միջև եղած լուռ բախումը: Երուխանի նովելներում վերոհիշյալ առանձնահատկությունը ընդգծված սկզբունքից է բխում: Գրական կերպավորման հենց այդ սկզբունքով էլ նա, ասես, կատարում է Բուալոյի այն հանրահայտ պահանջը, թե «բառերի սահմանը նեղ լինի, իսկ մտքերինը՝ ընդարձակ»: «Վերջին առաջարկը» նովելում երիտասարդ տղան ու աղջիկը առաջին անգամ իրար են հանդիպում մեծաշուք երեկոյթում, սիրահարվում են: Նրանք, սակայն, չեն արտահայտվում (դա, ինչ խոսք, կընդարձակեր նովելի ծավալը), այլ միմյանց հետ «խոսում են» հայացքներով: Տղան ու աղջիկը լուռ պարում են, բայց այդ լուռությունը՝ մնջախաղ-դիմախաղը, շատ բան ասող գործողություն է:

Ծովում խեղդվում է ձկնորս Հուսեփը («Վաղարարուհին»): Նրա սիրած աղջիկը՝ Վաղարարուհի Սուրբիկը, ապրում է ծանր ու ցնցող դրամա: Երուխանը իր հերոսուհու ողբերգությունը բացահայտում է նրա դիմախաղով: Այդ մնջախաղ-դիմախաղում ասես պերճախոս լեզվով պատմվում է այն մասին, թե ինչպես է ջրախեղդ ձկնորսը շարունակում ապրել խոնարհ կույսի հոգևոր աշխարհում:

Երուխանի ուժի համար առանձնահատուկ է և այն, որ շատ հաճախ հեղինակային պատումն ու նկարագրությունները իրենց տեղը զիջում են գրական հերոսների ներաշխարհի ինքնաբացահայտմանը: Նման պարագաներում հաղորդակցման ներքին ակորդները աչքի են ընկնում խիստ սակավախոսությամբ, բայց և, ընդհակառակը, գործողության հարստությամբ, շատ բան ասելու պոռթկումով և միմյանց ըմբռնելու արվեստով: Ու այսպես, գրական հերոսները հասկանում են և ըմբռնում միմյանց, իսկ ընթերցողը՝ հերոսներին ու հեղինակի միտումը: Այսպես՝ «Տապանագիրը» նովելի երիտասարդ նորապսակները ավանդական ծիսակատարության նպատակով գնում են գերեզմանատուն: Նրանք լուռ քայլում են կողք-կողքի: Երիտասարդը սրտով կապված չէ իր հարսնա-

ցուին, նրա իսկական սերը թաղված է գերեզմանոցում: Այնուամենայնիվ, նա իր կողքից ընթացող աղջկա նկատմամբ ուշադիր լինելու ձիգեր է անում, սակայն երիտասարդի շարժումները բռնազբոսիկ են, սրտի թելադրանքներին հակառակ: Աղջիկը հաղորդակից է տղայի հոգեկան ապրումներին և իր ենթադրությունների մեջ համոզվելու համար դիտում է, հետևում ու զննում: Նա իր արտահայտած մտքերի ու շարժումների առաջ բերած տպավորությունը ձգտում է տեսնել և կարդալ երիտասարդի դեմքի վրա: Եվ այդ բանը հերոսուհուն հաջողվում է: Այստեղ արտաքինը դառնում է հայելի, որի մեջ դրսևորվում է հերոսի ներաշխարհը: Նովելի հերոսուհին սրտի անհուն կսկիծով, բայց և անսխալ կռահում է երիտասարդին համակած խոհի իմաստը՝ տղան փնտրում է իր իսկական սերը, կորցրած Մաքրիկին:

Երուխանը հատուկ խնամք է տանում նովելի մուտքի և ավարտի վերաբերմամբ: Մուտքը նրա մոտ կա՛մ առարկա-պատկեր է, կա՛մ գործողություն-պատկեր: Երկու դեպքում էլ դրամատիկական երկի կամ կինոսցենարի ռեմարկի տպավորիչ նմուշ հանդիսացող մուտքը տեսանելիորեն իր մեջ խտացնում է տվյալ նովելի գաղափարական աղբյուրը: Ավարտը Երուխանի մոտ շատ ավելի է համապատասխանում նովելի ժանրային առանձնահատկություններին: Հիմնականում անսպասելի, բայց շատ համոզիչ ու իրապաշտ ավարտը որոշ նովելներում («Պատիկ Սեփին պատմությունը», «Թաշկինակը», «Ջրհանկիրի մը պատմությունը»), սակայն, անիրական է, չնայած հեղինակը ձգտում է ստեղծել իրականի պատրանք:

Բնությունը Երուխանի նովելների անբաժանելի տարրն է, գրական հերոսի սրտի տրոփյունը, մեծ իմաստ ունեցող բնականար, որը ձուլվելով կերպարին, ավելի շոշափելի է դարձնում գրական հերոսի դիմանկարը և նրա հոգեբանությունը: Այն, ինչ դժվարանում է արտահայտել նովելի հերոսը, պերճախոս ձևով բացատրում է բնականորեն: Երուխանի վրձնած բնականորեն ծովափնյա ժողովրդի հավաքական կերպարի հոգեբանությունն է: Ծովի մոռունչն ու կոհակների վետիլետանքը, գիշերային պատկերները և աշնանային հեծյունները, երազանքի պահերն ու հանդարտորեն իջնող ձյունը, միալար անձրևն ու տապահեղձ շոգը, նավերին ուղեկցող դելֆիններն ու ծովի սպիտակ փրփուրների վրա թևաբախող ճայերը Երուխանի նովելներում վարպետորեն «մարդկայնացվում» են: «Հուզվող» ու «խորհող» բնությունը դաշնավորում է տառապող հերոսին՝ իր գեղեցկությունների մեջ ցուցադրելով մարդ-անհատի գեղեցկությունները, իսկ սարսուռների մեջ՝ այդ անհատի ներաշխարհային տվյալանքները: Ցուցադրելով մարդու և բնության դաշնությունը, Երուխանը հակադրվում է մարդ-անհատին մանրացնող բիրտ իրականությունը: Աշխարհը անհուն վիշտ է պատճառում մարդուն, իսկ բնությունը, ընդհակառակը, սփռվում ու մխիթարում է նրան:

Այս ֆոնի վրա էլ Երուխանի նովելներում բացահայտ կոնֆլիկտ կա նաև իրականության ու բնության միջև: Ընդունելով ավելի մեծ խորհուրդ, բնությունը ձուլվում է մարդուն, նույնաժամանակ նրան: Ու այս իմաստով էլ բնության և իրականության միջև եղած կոնֆլիկտը կարելի է դիտել որպես մարդու և իրականության բախում, քանի որ Երուխանի մոտ բնությունը ոչ թե անկենդան է, այլ «մտածող»: Նովելիստը պղտոր ջրի խորհրդավոր մոռունից դնում է տառապող հերոսի հոգոցների աշխարհը, հայրենի գեղեցիկ և թախծոտ բնապատկերներից՝ դեպի վշտամորմոք հերոսների ինչ-որ բան ակնկալող հա-

յացքների անհունը: Այսպիսով, բնապատկերը Երուխանի նովելներում գրական կերպարի ներաշխարհի կամ նկարագրվող իրադրության հարադատ թարգմանն է:

Իր նովելներում Երուխանը կերտում է գեղեցիկի էությունը ցուցադրող շողշողուն մակդիրներ: Այսպես օրինակ՝ դեռատի աղջկա արտաքին բարեմասնությունները ցույց տալու համար նա օգտագործում է վարդերանգ դեմֆ, լեցուն, կլորիկ արմուկներ, մանկամարդ աղջկա մեղույշ աչվրներ, ֆաղցր ու ոսկեգօծ հյուս մակդիրակիր արտահայտությունները («Մարկոս աղբոր սերը»): Այս և նման մակդիրների ընտրությունը պայմանավորված է նովելի հակիրճությամբ ու հեղինակի գեղարվեստական մտածողությամբ: Նմանօրինակ մակդիրակիր բառակապակցությունների յուրահատկությունն այն է, որ առարկայի հատկանիշի ցուցադրմամբ ընթերցողի երևակայական պատկերացումների մեջ որոշակիորեն ստեղծվում է առարկայի և նրա կատարած գործողության պատրանք: Երուխանի կերտած մակդիրը աչքի է ընկնում ներքին լարված դինամիկայով: Այս առանձնահատկության շնորհիվ մակդիր-էպիտետը ոչ միայն դիպուկ բնորոշում է, ասենք, պարմանիի և պարմանուհու արտաքին գեղն ու հմայքը, այլ նաև նրանց ներաշխարհային շարժումը, ոչ միայն հերոսներին շրջապատող միջավայրը, այլ նաև այդ միջավայրում տեղի ունեցող գործողությունը՝ լուսավորվող աշխարհ, մեռելաբույր վայր, հրաշագուն ոստան, բազմաթուր բազմություն, գեղունակ դեմֆ, բոցավառ սեր, սաստկատենչիկ իդեալ, ոսկի հույսեր, աղչիկ գեղանագ, պարկեշտասուն օրիորդ, խանդակաթ ճայվածֆ, սիրատարիկ զույգ, սրտակեղեֆ մրմունջ, հեզիկ սյուֆ, հուզյալ սիրտ, նագելագեղ կեցվածֆ, դեմֆը մահատիպ դալուկով աչվրներ:

Հերոսի արարքը բնութագրող դինամիկան ավելի ուժգին արտահայտություն է ստանում գործողության հատկանիշը ցուցադրող ետադաս պարագաների (գործողության մակդիր) տեղին գործածության շնորհիվ. «կնայեր սպիտակ քարին սևեռալինդ», «պահ մը կանգ առնելով ակնապիշ», «գերեզմանաքարերը կղններ տաբտամ ակնաբկով», «չորս դին նայեցավ խելահեղորեն» («Տապանագիր»): Պատկերավորման այս եղանակով հեղինակը հերոսի արարքում առանձնացնում է ամենազլխավորը, ստեղծելով զրա տեսանելի պատկերը: Գործողության այսօրինակ շեշտվածությունը երկի հերոսին երևան է հանում իբրև որոշակի բնավորություն, որի արարքը բխում է ներքին լարված հուզաշխարհից, և կերպարի որոշակի հոգեվիճակի գործնական դրսևորումն է:

Մավալի փոքրացման և բուլանդակության «մեծացման» ճանապարհով Երուխանը նովելի ժանրում հասնում է զգալի հակիրճության: Այստեղից էլ հեղինակի ոճական այն առանձնահատկությունը, որ բառը, նախադասությունը ունեն մեծ տարողություն և սեղմ ձևի մեջ պարփակում են լայնածավալ գործողություն: Երուխանի նովելներում բառ-միավորը ավարտուն, պերճախոս գործողություն է:

Երուխանը կերտում է պատկերավոր համեմատություններ ու էպիտետներ, շրջուն շարադասություններ, փոխաբերություններ և փոխանունություններ: Նա օգտագործում է նաև երգիծական արվեստի բազմազան տեսակները՝ հեղնանք, խոսքի ու դրույթյան կոմիզմ, իսկ բացասական տիպերի նկատմամբ՝ սպանիչ ծաղր՝ սարկազմ: Խոսքի պատկերավորման ու արտահայտչական միջոցները խստագույն ճաշակով ծառայեցնելով իր գեղագիտական իդեալի բաց-

ցահայտմանը, Երուխանը դրանով ավելի ու ավելի սեղմում է նովելի ծավալը և, ընդհակառակը, ընդլայնում բովանդակությունը:

Երուխանի նովելներում կերտված համեմատությունները, արտահայտելով երևույթի ու եղելության ամենաէական հատկանիշը, դիտվում են որպես խտացված առարկա և խտացված գործողություն, որոնք բացահայտվում ու ծավալվում են ընթերցողի երևակայության մեջ: Ստեղծագործող նովելիստն ու «ստեղծագործող» ընթերցողը լրացնում են միմյանց:

Երուխանի ստեղծագործությունների լեզուն գրական արևմտահայերենն է, որը երբեմն-երբեմն միայն կրում է թրքաբանության (աճապ, բապուճ, պենկին, թուլումպա, լաֆ), բարբառայնության (ծառք, ծուկ, սվոնք), գրաբարի (ի տղա տիոց, ի նա, ջուրց մեջ, կթափանցե ի ներքո ի քեզ) դրոշմը: Նկատելի է, որ նովելներում հեղինակային պատումը զերծ է լեզվական վերոհիշյալ շերտերից, որոնք երևում են գրական հերոսների երկխոսություններում ու մենախոսություններում:

Երուխանի կերպարների լեզվամտածողությունն ու լեզվաարտահայտչականությունը պայմանավորված են հենց այդ մարդկանց մտավոր կարողություններով, սոցիալական միջավայրով, շրջապատով ու զբաղմունքով: Եթե Գրիգոր Զոհրապի հերոսները գերազանցապես բարձր խավի մարդիկ են և, բնականաբար, օգտագործում են գրականորեն ընտիր բառեր ու արտահայտություններ՝ ձգտելով իրենց լեզվամտածողությանն ու լեզվաարտահայտչականությանը հաղորդել փայլ ու պերճություն, ապա Երուխանի հերոսները իրենց գործածած բառերում, դարձվածքներում ու արտահայտություններում մնում են որպես «խոնարհ դասակարգի» մարդիկ: Եվ այլ կերպ լինել չէր կարող. Երուխանի ձկնորսն ու լվացարարուհին չէին կարող արտահայտվել այնպես, ինչպես Զոհրապի իրավաբանն ու բժիշկը: Իր հերոսներին խոսեցնելով իրենց իսկ լեզվով, Երուխանը հարազատ է մնացել գրական կերպարի տիպականացման և լեզվական անհատականացման դրույթին:

ХУДОЖЕСТВЕННЫЕ ОСОБЕННОСТИ НОВЕЛЛ ЕРУХАНА

С. В. ОГАНЕСЯН

(Резюме)

Западноармянский демократический писатель, публицист и педагог Ерухан (Ерванд Срмакешханлян, 1870—1915)—талантливый мастер новеллы. Его высокохудожественные новеллы проникнуты глубоким сочувствием к простым людям, отличаются сжатым сюжетом, тонким лиризмом, интересными диалогами.

Образный язык Ерухана красочен и богат. Без прямых оценок, с помощью средств художественного изображения и выразительности, небольших пейзажных зарисовок, краткого и меткого изображения обстановки Ерухан раскрывает мир человеческих отношений, психологию и душевную красоту своего положительного героя.